

那文毅公奏議

邵文毅公初任直隸總督奏議卷四十六目錄

卷四十六

興復義倉

籌補常平

因時改鑄

那文毅公初任直隸總督奏議卷四十六

上海市歷史文
物圖書館藏

男
容安恭輯

興復義倉

嘉慶二十年二月初七日

奏爲直隸義倉年久廢弛現在飭查整理期復舊制而
收實效先行恭摺奏

聞事竊查直隸義倉係乾隆十八年間經前任總督臣方
觀承奏請建置共計一千零五區報捐新舊穀共
二十八萬五千三百餘石定有勸捐獎勵典守出
納之法規畫井然利條不紊並刊印義倉圖說進

呈

御覽迄今六十餘年其間偶遇水旱偏災以及每歲青黃不接貧民賴以周掾接濟較之勦

帑發粟尤爲便捷洵屬有益閭閻惟是歷年久遠牧令奉行未能實力舊章遂至廢弛檢查嘉慶十九年咨部案內通省義倉僅存穀七萬五千五百二十九石有零加之民欠穀八千五百五十七石有零共止存義穀八萬四千八十六石有零雖由節年動用並奉

旨豁免所致然勸捐不能增多卽此可見兼聞嘉慶六年

大雨之後各處倉房多有倒塌至今尚未修葺若不加整理再事因循恐前人良法美意將成虛設
寶爲可惜伏惟我

皇上勤求宵旰

念切民依備荒足食之政無不上煩

容慮而

臣仰蒙

恩命身任封疆似此有益於民之事首宜悉心查辦以副
委任

臣

與藩司錢臻商酌該司亦同有此志隨於接見屬

員之時詢問如何辦理可以仍復舊章各令因地
制宜具稟核示茲據各屬稟稱原建倉版年久失

修本未堅固六年大雨之後多半傾圯所存穀子
或歸併常平或存貯民房爲數均屬有限若欲仍
復舊章必須年歲豐稔方可勸捐辦理第直隸地
方連歲偏災修倉捐穀同時並舉誠恐民力未逮
懇請酌分先後次第舉行紳民自必樂從等情陸
續具稟前來臣伏查義倉之設爲備荒第一良法
今直隸義倉自乾隆十八年建置以來閱時旣久
坍塌甚多自應先修倉房次捐穀石庶民力紓徐
不致棘手難辦查原建議倉一千零五區現在何
處已經坍塌何處尚屬完固臣已通行各屬開報

一面專委委員分司核對俟開報齊全共計坍塌者若干處完固者若干處應如何修理臣再行督同藩司首府悉心酌議通飭各屬曉諭紳民自行捐修勒限報竣仍察看年歲收成實力勸捐其倉房完固各處毋庸捐修仍令先行捐穀以資貯備總不許假手書役以免滋弊俟修理完竣捐有成數另行具奏至前督臣方觀承原定規條有今昔異宜之處統容臣率同藩司確核情形斟酌損益另議條規開單奏請

聖訓謹

奏奉

硃批洵屬善政未易辦理

嘉慶二十年十月二十三日

奏爲具奏請

旨事竊

臣

前因直省設立義倉每年勸捐穀石偶遇水旱

偏災以及青黃不接貧民賴以調掇接濟大爲有

益近年義倉穀石所存無多並聞原設倉座多有

傾圮當卽

奏明飭司整理恭奉

硃批洵屬善政未易辦理欽此隨據該司督同首府酌議

興復義倉勸捐典守章程分飭各屬或先修倉廩
或先捐穀石或俟秋收後再行捐辦俱經批飭遵
照在案本年秋收豐稔又經臣通飭各屬乘此年
豐穀賤迅速實力妥辦總期無虛無擾不許假手
胥吏收貯亦歸民間自行掌管其所修倉廩是否
完竣現捐穀數共有若干石飭令隨時具報去後
茲據保定府知府阿霖等稟稱據沙河縣知縣黃
郁章具稟各村倉廩俱已修建完竣勸捐義穀已
有六百石有零尚未截數又據署遷安縣知縣汪
本具稟勸捐義穀已有五百餘石亦未截數各等

因前來臣伏查義倉之設本屬良法第恐辦理不善轉致擾累閭閻或遇收成歉薄亦難驟議興復今直省義倉於本年奏准修復之後仰賴

皇上洪福通省所屬秋收一律豐稔該縣黃郁章汪本及時勸導有方首先報存捐穀五六百石之多尙屬實心辦理自應奏請量加獎勵俾各該牧令咸知盡心民事庶良法可期實效相應

奏明仰懇

聖恩可否將沙河縣知縣黃郁章署遷安縣知縣汪本均交部議敘以示勸勵之處出自

逾格天恩至其餘各屬或稟稱修理倉座將次完竣或稟稱勸捐穀石陸續交納統計共有數十州縣臣仍劄司府諄飭毋許稍有擾累核實具報其尚未遵辦之州縣亦俟查明另行核辦謹

奏

謹按嘉慶二十年十月二十七日奉

上諭據那彥成奏沙河縣知縣黃郁章勸捐義穀六百石有零署遷安縣知縣汪本勸捐義穀五百餘石請將該二員交部議敘等語該縣等勸捐義穀係地方官分內應辦之事並非自出已資捐輸急公若卽給予議敘現

在直隸州縣勸捐穀石者甚多將來豈能普加甄敘若該縣等實能盡心民事該督自行存記於計典保舉章疏內將勸捐義穀一事一併列入政績尚屬可行此時無庸給予議敘也

嘉慶二十一年正月初四日

奏爲直屬通省興復義倉官民倡勸捐輸現在截數統計十六萬餘石恭摺奏並分別請

旨仰祈

聖訓事竊照直隸通省義倉經前督臣方觀承創建後年久廢弛不但穀石鮮有實貯卽城鄉各處倉廩均

多坍廢傾圯上年春間臣查明舊規酌議興復飭令藩司督同首府設局派員妥議章程分定條規行知各府廳州董率所屬各就地勢民情悉心斟酌辦理當將興復緣由奏蒙

聖鑒欽奉

硃批洵屬善政未易辦理欽此自去秋以後各屬收成一

律豐稔又經臣率同在省兩司道府先議倡捐以

爲通省表率臣捐穀三千石鹽政廣惠捐穀三千

石在省兩司清河道首府共捐穀七千石並各道府運司直隸州倡捐亦有一萬五千餘石實力督

辦諄飭各州縣等務各因地制宜設法倡勸不許假手胥吏稍有派累強擾等弊仍飭令將所辦情形隨時稟核嗣據各州縣等陸續稟報臣於年終封篆後飭司督同局員截數彙核茲據稟稱通省院司鹽政道府州縣共倡捐義穀四萬八千二百十六石紳民人等共樂輸義穀十一萬八千四百一十三石九升統共捐穀十六萬六千六百二十九石九升並據紳民等樂輸助修倉廩磚瓦木料銀二千八百四十兩制錢三百四十千文內有倉廩已經修整穀數較多者曲周等七州縣又有倉

未修竣而穀數亦多或倉已修竣而穀數較少者
遷安等五十州縣復有倉未興修而勸穀數不甚
多者廣宗等七十州縣此外間有地方被水錢糧
緩徵及牧令新舊更易勸辦尚無實數者東安等
十四州縣分晰開單稟報前來臣伏查義倉之設
儲豐年之有餘備歉歲之不足原係地方第一善
政第辦理固須嚴實而機會必資豐稔仰託

聖主洪福

感召和甘上年直隸通省秋收普遍豐熟該地方官等遵
奉條規倡勸兼行各屬糧價平減閭閻踴躍輸將

咸知民捐民用民修民貯牧令第董其成吏胥一
無經手已捐者源源運收未捐者蒸蒸日上義湖查
前督臣方觀承創建之時自乾隆十一年起至十
八年二月始據奏報新舊義穀二十八萬五千三
百餘石此次倡勸甫經數月現已截數十六萬六
千六百餘石實皆荷賴

精誠孚格

昊穹鑒佑得藉全境之豐稔俾資良法之儲積從此屢豐
告慶大有頻書益可餘一餘三垂諸永久閭省官
民無不臚頌

皇仁同聲忭慶至各州縣辦理勸捐情形不一雖均係地方官分內應辦之事但興復伊始似此民食攸關之舉如果乘時妥辦自應仰體

鴻慈量予分別鼓勵俾牧令咸知民事爲重可以資觀感而裕久計所有首先稟辦之沙河縣知縣黃郁章遷安縣知縣汪本業經奏奉

諭旨飭令臣存記隨時鼓勵現在核明曲周縣知縣劉雲倡捐穀一千石勸捐穀五千零四十石廢倉八處均已建完候補直隸州署晉州知州張杰倡捐穀八百一十七石勸捐穀四千石倉廩四處俱已修

整該二員修倉勸捐同時並辦穀數較多合無仰懇

恩施交部從優議敘又磁州知州何道榜倡捐穀五百石勸捐穀五千零二十八石邯鄲縣知縣尹鴻璐倡捐穀五百石勸捐穀三千二百二十二石該二員已於灤州王殿魁等案內邀

恩議敘外永年縣知縣袁俊倡捐穀五百石勸捐穀三千七百一十六石新城縣知縣陳景登倡捐穀五百石勸捐穀三千二百五十五石成安縣知縣花濂佩倡捐穀五百石勸捐穀二千五百石以上三員

倉座分別修葺穀數亦多請

旨交部議敘此外間因被水緩徵之東安等各州縣臣飭
俟察看本年收成再行辦理其到任未久各員亦
俟其輿情孚洽聽民自便毋得稍有勒派強擾總
期良法可收實效善政益垂久遠仰副

皇上軫念民依之至意再查紳民人等從前經方觀承奏
定捐交義穀案內二百石以上者給予九品頂戴
三百石以上者給予八品頂戴四百石以上者給
予七品頂戴乾隆年間奏奉

恩旨賞給有案此次捐輸義穀之各屬紳民若照舊自二

百石起卽予九品頂戴未免過優臣請以三百石爲斷三百石以上給予九品頂戴四百石以上給予八品頂戴五百石以上給予七品頂戴除三百石以下者由臣及藩司道府廳州等分別酌給匾額示獎五十石以下者該州縣酌給花紅匾額賞資外現在覈明遷安縣候選員外郎姚開第捐穀三百石修倉銀五十兩撫寧縣候選千總鄭國鼎捐穀三百石新城縣武舉郭英和捐穀一千石深州候選守禦所千總李桂馨捐建義倉一座核計工料銀五百餘兩折照穀價約五百餘石捐職布

政司經歷侯從周捐穀五百二十石以上五名均
係捐職候選人員未便再給頂戴請

旨將姚開第鄭國鼎郭英和李桂馨侯從周均交部照例
議敘又饒陽縣已革捐職從九品索崑齡曾經緣
事發配援減釋回此次捐穀五百二十石應請

賞給原捐從九品頂戴新城縣監生李生榮長垣縣文童
徐占元均各捐穀五百石請將李生榮徐占元俱
賞給七品頂戴如此分別獎勵該紳民等益知鼓舞奮勉
聞風嚮慕各州縣乘機勸導於興復舊制遞年儲
備之道不無稍有裨益再責成該管道府廳州於

各屬收竣盤查結報遵照議定條規仍交紳民公舉之倉正倉副專司出納借還一切事宜無致官侵吏蝕謹

奏

嘉慶二十一年正月初六日奉

上諭那彥成奏直屬通省興復義倉倡捐勸捐各員請旨分別鼓勵一摺直隸通省義倉因年久廢缺倉廩亦多傾圯前經那彥成奏明飭屬興辦茲據奏此項倉穀自飭辦以後地方官倡勸兼行紳民亦踴躍樂輸並捐資修理倉廩甫經數月已截數至十六萬六千六百餘石

辦理尚爲妥協所有勸捐各員除知縣黃郁章汪本前
已有旨令該督存記隨時鼓勵知州何道榜知縣尹鴻
璐於另案加恩外曲周縣知縣劉雲署晉州事候補直
隸州知州張杰修倉勸捐同時並辦穀數較多著加恩
交部從優議敘永年縣知縣袁俊新城縣知縣陳景登
成安縣知縣花濂佩俱交部議敘其捐輸紳民除三百
以下者由該督等分別獎賞外其捐穀數多及捐建義
倉之候選員外郎姚開第候選千總鄭國鼎李桂馨武
舉郭英和捐職布政司經歷侯從周俱著交部照例議
敘監生李生榮文童徐占元俱賞給七品頂戴以示獎

勵該部知道

籌補常平

嘉慶二十年十一月十一日

奏爲酌籌採買常平倉穀以資儲備事竊照常平倉穀
原備民間緩急之需遇有缺額卽應隨時買補以
資儲備查直隸省十七府州屬常平倉額貯穀二
百二十一萬八千三百餘石緣連年水旱不齊偶
被偏災疊蒙

聖恩分別賑濟豁免民欠出借穀石或協撥鄰封動缺或
因各州縣厯任虧缺已入初二三次清查並交代
續虧案內奏咨追賠償銀以致倉穀多有缺額曾

於嘉慶七年間經前督

臣

顏檢奏明將賑缺豁缺

撥缺常平倉穀先行動項採買穀三十萬石派令

各州縣妥速購買內已採買過穀十五萬餘石其

餘穀十四萬餘石於十二年經前督

臣

溫承惠奏

請緩買之後頻年歲歉市糧價昂未得照數買足

今歲直省地方自五月十二日得有透雨之後晴

雨應時雖間有窪地被水歉收之處不過一隅中

之一隅核計通省收成實爲十數年來未有之豐

稔現在百穀俱已登場豐登有慶小民除留備口

食之外均思糶賣以備家用無如鄰省大勢豐收

市糧擁擠價值日減轉有穀賤妨農之虞若乘時
採買倉穀洵於官民兩有裨益伏查直屬各州縣
常平倉額貯穀石除平糶並出借民欠未完以及
現存在倉之外計有賑缺豁缺撥缺穀八十一萬
四千四百五十二石零又歷任虧缺已入初二三
次清查並交代續虧案內奏咨追賠穀七十五萬
七千九百二十一石零共計缺額穀一百五十餘
萬石自宜趁此豐收之年分別買補其賑缺豁缺
撥缺穀石應請按照部定價值每穀一石給銀七
錢在於司庫地糧並

恩賞經費及當襍旗租等項銀內動用虧缺穀石在於司庫初二三次清查並交代續虧案內追存穀價本款銀內撥給倘本境所產高粱居多或因山路崎嶇運穀費繁准將高粱粟米等項一體收買仍照例折穀如遇青黃不接之時量爲出借易穀還倉統俟事竣造冊報銷惟是額缺穀石爲數較多且直屬地方十數年來收成歉薄今歲始得豐稔若全數買補又恐勢有不能且穀價太多亦不能一時並發臣與藩司斟酌何處應先辦理酌量地方情形以次買補總歸核實務使民食無礙而倉儲

得以由漸充盈方爲妥協除俟各府廳州查明覆
到再行彙核咨部卽行發價採買外至領買之後
若不將出入稽查守貯嚴立章程仍恐易滋弊混
臣與藩司錢臻悉心籌議酌定條款所有應買缺
額穀石動用銀兩及籌議稽查各緣由謹分繕清
單敬呈

御覽伏乞

皇上睿鑒勅部查核施行再查各州縣平糶常平倉穀本
有糴存原價可動應請仍照向例動支糴存原價
銀錢採買貯倉分別報部又嘉慶七年

奏明未買常平倉缺額穀十四萬餘石已核入現在籌
買賑缺豁缺撥缺穀八十一萬四千四百餘石之
內合併陳明謹

奏奉

硃批戶部議奏

謹將直隸省屬應買缺額穀石及動用銀兩各數
開列清單恭呈

御覽

計開

一順天永平保定河間天津正定順德廣平大名

宣化承德等十一府遵化易州冀州趙州深州
定州等六州並張理廳常平倉項下

額貯共穀二百三十一萬八千三百二十六石七
斗三升一合一勺

又溢餘穀五萬五千九百一十一石六升九合

二共穀二百二十七萬四千二百三十七石八
斗一勺內

清查交代續虧共穀七十五萬七千九百二十一
石七斗二升七合六勺四抄

平糴穀六萬零八百六十四石八斗九升五合糴

收價銀二萬八千四百七十五兩七分六釐一毫制錢二萬二千三百七十六千五十五文內存司庫銀八千三百二十一兩三錢四分三釐府州縣庫銀二萬一百五十三兩七錢三分三釐一毫制錢二萬二千三百七十六千五十五文

民欠出借穀八萬三千九百八十七石九斗六升四合五勺

現存穀五十五萬七千零十石九斗一升四合二勺

謹將籌議採買倉穀出入稽查守貯章程臚列清單恭呈

御覽

一發價採買應責成道府監同辦理也查各州縣應採買穀數查明詳定之後或由司庫給發價銀或動用糶存原價若聽該地方官自行採辦在潔已奉法之員自必秉公購採不肯從中滋弊其或心存不肖者難免不假手胥吏派累折收以及尅扣平色等項不可不預爲之防自應責成各道府廳州督率採買州縣按照原額原

糶價值眼同散給有穀之家並於交穀時監同平斛量收事竣出具印監各結造冊層層加結由司彙核詳銷以杜弊混

一採買完竣應委隔屬大員盤驗也查各州縣於買穀報竣後有無買少報多及以醜報好雖係道府監督收買尚恐稽查未周應由藩司另派隔屬道府大員前往各州縣互相盤驗眼同封貯據實結報總督藩司臬司遇便仍往親查具奏如此各有責成自不肯爲人徇飾以昭核實

一收貯穀石應責成本管上司稽查也查直隸各

屬倉糧固有因公動缺糶缺之項而歷任虧缺者亦復不少溯厥由來大抵私自挪移或支發因糧署中食米以致廩粟消糜若令州縣司其啟閉勢必仍蹈前轍轉以買補供其私挪自應責令該管道府廳州於互相盤驗後各給所屬州縣鎖鑰印封嚴密收貯如遇出借平糶以及因公動用等項卽申由該管道府廳州委員監同辦理事竣仍請給發鎖封照舊封誌倘州縣仍敢私自動用立予詳叅如該管道府廳州容隱不舉一經總督兩司查出卽將虧挪穀石著

令賠補一併從重叅辦

一應申明盤查定例以收實效也查向來道府廳州到任例應將所屬州縣倉廩錢糧盤查結報庫貯銀款盤兌尚易而倉貯穀石盈匱滿箱往往易爲朦混應令各道府廳州於到任時親赴各屬查明存糧厥口出此入彼徹底盤量出具無虧印結通報備案

一停買穀價應解繳司庫以杜虧挪也查各州縣領價採買穀石於開糴之後或因市價增長難以購買通報停緩其原領價值如令羈留屬庫

易致侵挪應令該管道府廳州一據詳報停買
卽飭將價銀解繳司庫分別存貯歸款不得稍
任稽延

一貯倉穀石應隨時曬晾以免耗折也查花戶領
價交穀官爲驗收當時自屬乾潔然終年備貯
爲日過多潮濕所蒸易於霉變應令各州縣於
每年秋間揀擇晴爽日期出倉透晾一次仍先
期申請本管道府廳州委員監同出納以免乘
機侵盜

一採買若干宜隨時具奏也各州縣領價採買或

照數買竣或勢難全買報明停緩經該管道府
廳州盤驗結報之後藩司彙核通案共計酌發
銀兩若干採買穀石若干詳明總督隨時具奏
其未經買補穀石仍俟查看情形分年以次買
補亦隨時具奏庶倉儲由漸充盈買補益歸核
實

一年終宜將實貯全數取結詳奏也查常平缺額
原不能一時全數買補完竣必須分年酌買但
既經發價採買所有每年買補實貯全數應於
每年終由藩司咨取道府甘結詳請具奏如此

則每年買補實數分劃既屬明晰稽查亦屬簡
要

因時改隸

嘉慶十九年十二月初二日

奏爲村鎮繁要印官稽察難週請將縣丞主簿等官移
駐彈壓以重地方事竊照設官分職必須因地制宜
而今昔情形不同自應酌量更易茲查保定府
屬東鹿縣西北鄉一帶村莊距縣自四五十里至
六七十里不等民俗刁悍且與深澤縣接壤往來
遞解人犯餉鞘均由該處行走印官遠在城內稽
察難週必得設一專員彈壓巡查以昭慎重查該
縣設有縣丞一員與知縣同城並無應辦事件請

將該縣丞移駐小章莊改爲分防縣丞並將附近之張古等六十村莊併歸該縣丞彈壓又大名長垣自去歲地方平定後添設營汛各官亦須酌量今昔情形少爲變通移置方爲有益查大名府屬大名縣之龍王廟距城十八里本係漳衛二河合流之區商船聚集烟戶繁多一切彈壓巡防亦非專員不可查該縣設有衛河縣丞一員駐劄離城五里之舊縣地方管理河務之外別無事事請將該縣丞移駐龍王廟兼管巡檢事務又元城縣小灘鎮距縣城三十五里與山東朝城冠縣兩邑連

界人煙稠密水陸衝途亦應專員彈壓查該縣設有專管漳衛二河主簿一員駐劄縣城近年漳河淤塞歸併衛河合流直達山東館陶縣之王家莊綿長六七十里奔走修防殊多未便該處既需專員彈壓而小灘鎮與衛河切近請將該主簿移駐小灘鎮兼管巡檢事務既可就近防河又可彈壓地方洵爲一舉兩得又長垣縣之大黃集離城一百二十里與豫東兩省犬牙相錯俗有三不管之稱亟須專員彈壓查該縣設有管河縣丞一員駐劄縣城專管趙王陶北二河堤工近年工程稍簡

請將該縣丞移駐大黃集兼管巡檢事務以上移
駐各員除戶婚田土詞訟不得干預外其盜賊邪
教娼賭鬪毆等事均責成該員等就近查拏解縣
審辦仍將分撥彈壓村莊飭令各該縣勘明造冊
咨部所管村莊內如有盜劫案件卽將該縣丞主
簿作爲協緝開叅其應得廉俸及書役名數悉照
舊定章程毋庸更議除東鹿縣縣丞一員本係世
方毋庸另議外其大名長垣二縣縣丞並元城縣
主簿一缺均係河缺今請移駐兼管巡檢事務應
仍歸河缺補用臣與該管道府及兩司再三斟酌

並虛衷博訪均稱於地方有益今如此酌量移駐
既免添設改隸之繁而緊要地方得有專員彈壓
洵足以昭慎重如蒙

俞允所有改鑄印信應咨部頒發至建蓋衙署再行節省
辦理隨時咨部謹

奏奉

硃批該部議奏

那文毅公初任直隸總督奏議卷四十六

那文毅公初任直隸總督奏議卷四十七目錄

卷四十七

宣防疏濬

那文毅公初任直隸總督奏議卷四十七

男
容安恭輯

宣防疏濬

嘉慶十九年閏二月二十八日

奏查案據永定河道李逢亨稟稱上年六月間北六丁
舊堤因長水衝缺經該處賀堯營等村民人以力
難補築稟請動

帑辦理等情隨檢查舊卷並石刻碑記內載乾隆二十
年間經前任總督方觀承

奏請

聖駕親臨

指示機宜於北岸六工賀堯營開堤放水改爲下口入沙
家淀會鳳河入大清河以南坦坡埝爲南堤北越
埝爲北堤中寬四十五里任其蕩漾悉爲散水勻
沙地面等因查北六工原編二十號歷來估工總
至八號而止緣八號以東卽接北七工頭號迤下
卽屬下口原可不必修防又因八號至十號可作
北七工之挑水壩每年仍令官兵小心防守其餘
任其蕩漾賀堯營村坐落十六號向不在修防之
列惟因左近村民圖種河灘地畝惟恐時遭淹浸

間或集夫修築以資保護歷年亦聽其便現因漲漫塌堤未便請動官項以致又滋糜費稟請核示前來臣覆查該處南有南坦坡埝爲南堤北有北越埝爲北堤此堤居中坐落河心若逢盛漲水中堤尾倒漾前後一片汪洋修之無益至河內村莊原應移居堤外乃小民圖種灘地之利未免安土重遷亦止可聽其自爲設法防護此段堤工自十號以下向不在估修之內自應永遠停修並禁止該村民不許補築致過水道以省糜費而重河防
謹

奏奉

硃批覽

嘉慶十九年六月二十四日

奏爲恭報永定河伏汎安瀾仰慰

聖懷事竊據該道李逢亨稟稱本月初九日河水驟長蘆溝橋水深一丈零八寸南上南下汎北二北三各工埽段坐墊晝夜趕緊加鑲簽椿壓土得保無虞嗣又連次長水拍岸盈堤該道督率在工文武員弁實力防護並往來查看北岸三工第十二號尾舊埽七段迤下溜勢刷塌堤腳添下新埽五段又

第十八號舊埽六段之下大溜逼注刷塌堤根捲
下新埽一段其餘各工埽段預期飭令各廳汛將
淤朽者折修卑矮者加鑲簽椿壓土均屬一律整
齊卽有蟄陷之處皆隨時搶護平穩水勢隨長隨
消今伏汛已過各工悉臻穩固河流順軌安瀾等
情稟報前來臣伏查永定河本年入伏以後連次
長水埽段堤工間有蟄陷並被溜勢刷塌均經該
道督率文武員弁搶護平穩現在河流暢順各工
均臻穩固皆由我

皇上誠敬感孚

河神默佑得以慶洽安瀾臣欣幸之餘倍深寅惕惟此

時伏沘雖過秋沘正長仍飭該道廳等加謹巡防
不可稍存大意謹

奏奉

硃批覽

嘉慶十九年七月二十日

奏爲永定河水勢疊次增長各工搶護平穩情形恭摺
奏

聞事據永定河道李逢亨稟稱本月初一日蘆溝橋長水
一丈零五寸及消落時溜勢側注且緣秋水搜根

各工埽段多有喫重如南上汎十四號坐蟄三段
南下汎十一號坐蟄二段南三工六號坐蟄二段
均卽隨時搶鑲平穩初五日復經長水南三工第
九號大溜直衝刷去老灘直至堤腳趕緊多掛柳
枝層層搪護大溜復行上堤將埽段蟄塌旋復捲
下埽個簽椿壓土加鑲穩固北三工十七號大溜
坐灣潰傷堤腳初六日搶下新埽二段隨蟄隨鑲
至初八日丑時忽將前次所下頭段新埽藏頭堤
幫塌去水由埽後潰堤段段立蟄危險之至埽前
水深一丈五六尺至二丈不等接上堤幫仍復坍

塌不已隨又捲下新埽一段趕緊簽樁以冀鑲壓到底庶可保護以下埽段不致復潰隨即調集兵夫分投跑買土料趕緊搶壓至寅時河水復長一尺餘寸溜勢洶湧頃刻間埽後仍復潰堤四五尺不等所下新埽全行飄動當此喫緊之時天色未明水流更急該道親率廳汎員弁兵夫手不停力直至午時搶護漸平次早復於新埽以上又下裹頭埽一段以資包護共計下新埽四段搶辦三晝夜得以保護平安至北二工五號迎溜汕刷埽鑲連蟄三段北五工十號溜勢頂衝埽鑲蟄陷二段

均卽搶鑿平穩北八工連次長水二號第二三道
土壩疊經汕刷當卽採柳捆紮防風盤作裏頭以
資捍禦十號土壩亦經大溜刷去六丈有餘下游
堤工甚爲喫重隨卽運料採柳連夜趕緊將壩頭
搶鑿一日有餘始行出水業已加壓大土又十號
中圈埧腳大溜刷去寬五六丈長二十餘丈亦卽
運料趕做防風五段十三號大壩頂衝中段汕刷
蟄陷壩根業已滲水當於內幫密掛大柳外幫集
夫買土趕做後戩得臻穩固並將子埧俱行加培
現在各工均已平穩等情稟報前來查此次北三

北八等工疊經盛漲出險仰賴

皇上

洪福得以搶護平安

臣

感幸之餘益深凜畏現復諄飭該

道仍須親督在工文武晝夜巡防不可少有大意

謹

奏奉

硃批覽奏幸慰之至

嘉慶十九年七月二十六日

奏爲恭報秋汎安瀾事竊據該道李逢亨稟稱七月初

五日以後全河溜多側注且秋水搜根埽鑲易於

蟄陷茲復據各汎紛紛報險南上汎第十四號溜
刷埽根陡蟄四段趕緊買土買料加鑲平穩南下
汎第十一號埽鑲蟄陷入水三段當卽搶鑲穩固
南三工第六號河心淤出高灘河流漸近堤根當
於內外幫加高培厚搶下防風以資抵禦北二工
第五號河流橫趨第二十三四五段陡蟄入水隨
鑲隨蟄不分晝夜趕緊壓土加椿始臻平穩南二
工第二十號河流兜灣溜搜埽根蟄陷三段趕緊
搶鑲該處水深一丈六七尺隨鑲隨蟄幸料物充
足人心踴躍直至次日天明始護搶鑲穩固今屆

白露之期溜走中泓河流順軌石土堤埽閘壩各
工悉臻穩固等情前來臣查永定河修防緊要仰
蒙

聖主節次發

帑疏培俾堤岸高厚河漕寬深足資捍禦本年伏秋大
汎期內節次長水出險幸賴

皇上

鴻庥

河神靈佑得以慶洽安瀾臣感幸之餘益增凜惕謹
奏

嘉慶十九年七月二十八日奉

上諭那彥成奏永定河秋汛安瀾並將出力人員懇請鼓勵一摺本年永定河伏秋大汛節次盛漲所有在工各員弁晝夜巡防均屬不辭勞瘁永定河道李逢亨同知丁寶洲都司謝成守備李存志協備夏茂芳加恩均照所請交部議敘同知孫豫元在工防汛並無格外出力之處該督奏請賞加知府陞銜未免過優亦著交部議敘候補吏目捐陞縣丞包駁准其留於直隸以河工縣丞補用仍令捐足分發在藩庫完繳候補縣丞俞大勲准其改撥河工以對品補用河工候補縣丞張藻從九

品陳佩蘭張同勲地方候補未入流韓昺均着以本班儘先補用該部知道摺單併發

嘉慶二十年二月十三日

奏查永定河下口之水向由葛漁城東南流至三河頭入大清河嘉慶六年以後水勢漸向北趨將鳳河東堤衝有缺口數處其水改從鳳河東堤以外行走亦歸大清河節經前任永定河道王念孫等勘稟毋庸堵築以資宣洩上年冬間據該道李逢亨面稟有馬家口等村民人在鳳河東堤外私築土埝一道應行拆毀臣以該處缺口實在應否堵築

土埧應否拆毀面諭該道勘明稟辦茲據該道稟稱勘明該處缺口已經深寬若欲堵築非四五萬金不可且缺口適當迎溜頂衝堵合之後一遇汎水漲發必致復被衝缺實屬徒費

帑項於事無益仍請毋庸堵築至下口爲永定河之尾閭今鳳河又係尾閭之尾閭必須通暢庶可迅消盛漲今馬家口等村民人於此處築埧阻遏河流是下壅也下壅卽恐上潰於全河頗有關係應卽拆毀等情具稟核示前來臣查鳳河東堤自嘉慶六年被衝缺口以來迄今十有餘載水性就下已

成全河尾間且地處頂衝堵築之後必致復被衝缺應請毋庸堵築並將馬家口等村民人於鳳河東堤之外私築土埝立即飭令永定河道李逢亨會同天津道張五緯新任通永道祝慶承等即日親身前往督押拆毀以防阻遏謹

奏奉

硃批覽

嘉慶二十年六月初十日

奏爲永定河水漲各工搶護平穩並北七工堤埝卑薄難資抵禦現飭動用道庫銀兩趕緊加幫緣由恭

摺具奏事竊照永定河上游及附近地方自五月
中以來連次得有透雨河水漲發先經臣飭令永
定河道並廳汛各員隨時察看情形實力防護嗣
據永定河道李于培稟稱五月二十日以後河水
疊次增長北二工對面新生淤灘大溜側注埽前
勢甚洶湧埽段紛紛蟄陷北五工坐當迎溜頂衝
水深一丈七八九尺至二丈餘尺不等埽段俱有
蟄陷並有陡蟄入水者北七工隄南有洛圖灣以
河一道溜逼隄根水勢倒漾直至頭號北八工本
屬險工情形均爲着重經該道督率廳汛各員分

投搶護並於北七工添做防風挑水埽壩加幫子
埽又砍掛柳株以挑溜勢竭數晝夜之力始臻平
穩等情臣因本月初六日入伏已交大汎批飭該
道加謹防守一面奏明於初三日出省初五日抵
長安城卽據該道李于培稟稱北二工等處搶護
之後南上汎南下汎南二工南三工南五工處處
出險埽段蟄陷甚多經該道督率廳汎各員趕緊
搶鑲穩固並於南三工添下新埽五段南五工添
下新埽四段多僱人夫簽椿壓土奮力搶護始得
平穩水勢亦漸次消退等情臣卽先赴南岸週歷

查勘各工搶辦工程尚皆穩固又據該道李于培稟稱北七工十六號子埝於初五日坐蟄裂縫二十餘丈經三晝夜搶鑲得以保護平穩惟該處隄埝卑薄一遇水長誠不足恃必須量爲幫寬加高方可以資抵禦河工關係緊要平險止爭呼吸現值大汎期內水勢增長不定自應趕緊辦理未便遲悞當卽酌動道庫銀兩飭令該道督同該管廳汎各員迅速集夫買土連夜幫寬加高以資捍衛

臣仍卽親往查勘督辦務使卽日完竣不許稍有遲延及偷減滋弊除飭取高寬丈尺清單及用過

銀兩細數另行核辦再本年永定河水勢較大伏
汛方長臣擬在工次多住數日再行旋省謹

奏奉

硃批知道了

嘉慶二十年六月二十八日

奏爲永定河北岸七工第二十四號被水漫溢現在馳
往勘辦先行具奏事本月二十七日臣接據永定

河道李于培稟稱本月二十五日該道將南岸三
工出險各處搶護平穩後馳赴北岸查勘水勢途
次接據三角淀通判鄭以簡東安縣主簿邱鳳梧

並協防河間府同知王履泰候補通判單應魁候
補縣丞汪兆鵬等稟稱本月二十二日夜間北岸
七工雨大風狂水勢疊次增長黑夜之間但見中
泓水立有似蛟水竟不能計丈尺該員等竭力搶
護無如水勢有增無減兼之狂風驟雨人力難施
以致北岸七工二十四號於二十五日卯時被水
漫溢二十餘丈都司謝成浮淌現在尚無下落該
道馳至該處查看已塌去六十餘丈全河大溜直
注口門現在盤做裏頭並據鄭以簡回稱差人順
水查看水過口門後卽循隄外減河及窪處荒地

經行仍歸本河尾間下注東安縣傍水小村間有
被淹之處等情具稟前來臣接閱之下不勝驚駭
媿悚查本月臣親往永定河查勘工程水勢因北
七工自頭號起至二十二號止隄埵卑薄曾經

奏明動撥道庫銀兩酌量加幫今漫溢之二十四號雖
不在加幫之內查明向來因係平工僅止疏濬中
泓銀兩並無歲修搶修之項惟時屆大汎該管廳
汛及協防各員雖係暴長蛟水究屬失於防護以
致漫溢實屬疎玩查通判鄭以簡主簿邱鳳梧係
專管之員同知王履泰通判單應魁縣丞汪兆鵬

係協防之員均難辭咎相應奏請

旨將三角淀通判鄭以簡東安縣主簿鄧鳳梧協防河間府同知王履泰候補通判單應魁候補縣丞汪兆鵬均請暫摘去頂戴仍留工効力如果堵築迅速再請開復臣未能先事預防仰懇

聖恩交部議處至永定河道李于培到任甫逾一月應否議處出自

皇上天恩臣現在飛飭該道李于培趕緊購買料物一面在藩庫酌動銀三萬兩臣於二十八日親帶赴工確勘情形請

旨辦理其被淹村莊如有應行賑恤之處俟勘明照例奏

明請

旨分別賑恤不敢稍有諱飾再此項工程

臣

擬動用長蘆

鹽勛加價銀兩提到卽行歸款謹

奏

嘉慶二十年六月二十八日

奏北岸七工已與下口相近今漫溢之二十四號又爲

該工下段循減河道路迤邐而下其餘均係任水

蕩漾之區民廬田舍無大傷損且此時伏秋大汛

長水之時不必急於填合徒費工力

臣

到工後察

看情形將應辦事件料理一定仍於初六日出工
次起身詣

園跪請

聖安再赴北路查勘橋梁道路預備

轡絡經臨謹

奏奉

硃批覽

嘉慶二十年六月二十九日奉

上諭那彥成奏永定河工漫水一摺永定河北岸七工二
十四號因六月二十二日以後雨大水長漫口塌寬六

十餘丈該督現已飭令該管河道趕緊購買料物並親赴該工查勘此次永定河漫工距下口甚近過口門後仍循堤外減河歸入正河尾間現在盤做裏頭著那彥成確實勘明俟料物購齊卽行相機堵築復歸故道其失於防護之專管通判鄭以簡主簿邱鳳梧協防同知王履泰通判單應魁縣丞汪兆鵬俱著摘去頂戴仍留工効力如堵築迅速再行奏請開復永定河道李于培到任甫逾一月於河務情形尚未閱歷著加恩免其議處那彥成自請議處之處亦著寬免俟漫口堵合將用過工料銀兩著落該督分賠十分之三其被淹村莊並

著迅速查明奏請撫恤

嘉慶二十年七月初五日

奏爲勘明永定河北岸七工二十四號漫口情形酌籌
辦理事竊照永定河北岸七工二十四號於六月
二十五日因暴漲漫溢臣接據該道李于培稟報
飛摺馳

奏臣於二十八日拜摺後自省城起程晝夜兼行次日
馳抵該處帶同該道及廳汛各官親赴漫口逐細
履勘查該處距下口甚近水勢側注河身大溜掣
入口門後仍循隄外減河歸入正河尾間先據報

蟄陷六十餘丈及

臣

赴勘暴漲消落現在口門業

已掣涸僅止四十餘丈土性堅實俱無汕刷隨測量口門水深一丈七尺漫口以內水深五六尺七八尺不等漫口以外水深一丈一二尺不等減河正身尚無淤墊過高之處惟正河身因下游淤墊形成高仰通長應挑三十餘里必須實力挑挖深通方期順軌日來天氣晴霽俟稀淤曬涸即可先期勘辦至該處向係平工並無舊料其各工料物俱因搶險動用所餘無幾亦須留爲秋汛修防之用刻下新料尚未登場

臣

與道廳各官悉心籌酌

該工下游多係任水蕩漾之區既不妨民間田舍
此時正不必急議堵築一俟新料登場農閒之時
趕緊僱買定期八月內興工此時先將引河挑挖
深通將來堵築亦不甚費手定可一氣呵成仰慰
聖厯所有應用錢糧臣所帶加價生息銀三萬兩現在永
定河道庫存貯新舊防險及河淤地租並各員賠
項共銀五萬餘兩統計八萬餘兩儘此數目樽節
辦理已足敷用無須另行籌酌臣親督鈎稽辦理
務使工歸實用不令少有浮費至都司謝成先於
漫溢時被水衝倒旋即抱住隄邊大樹得不漂沒

謹

奏奉

硃批依議

嘉慶二十年七月十八日

奏爲永定河北七工第十號隄被水漫溢現飭趕緊
盤做裹頭俟差竣馳往勘辦先行恭摺奏

聞事竊差次自本月初九日晚間起直至十二日止連朝

大雨

臣

恐永定河上游水勢漲發各工出險一面

專差查探一面行文飭查卽據該道李于培具報
初十十一十二等日大雨傾注永定河驟長水一

丈餘尺由北六工廢隄十六號舊缺口奔騰而出
全注北七工自第一號至十四號汪洋浩瀚水勢
高出隄頂直與埧平情形頗爲喫重現在晝夜搶
護等情當經臣批飭該道督率廳汛及協防各員
加緊防護去後茲於十七日又據李于培稟稱十
二日夜間風雨更大水勢愈高兩岸各處險工在
在喫重飭令兵夫冒雨取土竭力搶護詎至十三
日丑刻第十號隄埧水勢一湧而過人力難施以
致漫口三十餘丈溜勢由東北折向東趨仍循減
河故道歸入前次漫溢二十四號漫水下注工尾

任水蕩漾之區滅河迤北之塹上等十餘村距隄三四里不等均有被淹外此處並無旁溢現已差弁往查另行稟報其二十四號漫口仍然分流等情具稟前來臣查北七工二十四號已有缺口此時大雨傾注各工在在危險若再於上游漫溢更屬不成事體工料加費數倍辦理愈難所幸仍在北七工十號漫缺相去不遠將來辦理尚不致十分棘手而村莊無多居民亦無傷損實皆仰賴皇上洪福於不幸之中尚爲有幸惟是刻下正在秋汎期內應俟白露後水退歸槽同二十四號漫口興工

堵合爾時二者之中必有一斷流旱口庶幾施工較易不致多糜

帑項現飭該道趕緊盤做裏頭臣一俟差竣卽馳往查

勘另行具奏至臣雖在差次距工稍遠但不能先時飭屬預防咎實難辭相應請

旨將臣交部嚴加議處謹

奏

嘉慶二十年七月十九日軍機大臣字寄奉

上諭那彥成奏永定河北七工第十號堤埝被水漫溢趕緊盤做裏頭並自請嚴議一摺永定河北七工漫口距

前次漫口不遠幸仍循減河故道下注未經旁溢那彥成現在差次趕辦橋道未能兼顧所有自請嚴議之處著加恩寬免其漫口處所業經盤做裏頭那彥成俟要亭送駕後卽馳赴工次查勘情形應如何歸併堵築之處妥爲辦理可也

嘉慶二十年八月初二日

奏爲查勘永定河北七工第十號並非漫口情形恭摺具奏並將疎防之廳汛各官參奏請

旨事竊

臣

前在差次接據永定河道李于培稟報七月初

十一十二等日河水驟長北七工第十號隄埝

漫溢三十餘丈經臣據稟繕摺奏

聞在案茲於七月二十八日馳抵永定河親詣北七工漫溢處所逐細查勘因七月初十等日河水陡漲溜勢北趨由北六工廢隄十六號舊缺口奔騰而出向西倒漾十餘里直至北六工廢隄與北七工正隄接連之處仍折回東注以致北七工第十號隄埝過水當時被漫情形本較二十四號爲輕現在連日晴霽水勢消落已成旱口止須築還土隄並非口岸可比惟二十四號漫口仍然分流應於中泓挑挖引河並於上游築挑水壩將溜勢挑入引

河方可施工堵合刻下雖距白露節候爲日無幾
惟因雨水過大遍地稀泥兵夫難以站腳尚難動
工應緩至八月二十日左右地土乾燥料物登場
再行擇吉辦理以期一氣呵成惟查永定河道李
千培以未能諳練河工不能看出形勢以致照漫
口具稟臣因在差次未能親勘是以據稟具奏今
經戴均元溫承惠同臣親身履勘實係旱口並非
口岸可否仰懇

聖恩念其雖屬冒昧具稟究出之過於小心不敢諱飾合
無仰懇

天恩免其議處仍令將第十號漫口罰令填築堅固不准
開銷至該管廳員鄭以簡泚員邛鳳梧均非初任
人員兩次失防實屬疎玩理合叅奏請

旨將三角淀通判鄭以簡東安縣主簿邛鳳梧革職仍留
工効力俟漫工堵完竣再行具奏請

旨謹

奏

嘉慶二十年八月初二日

奏戴均元到工口傳欽奉

諭旨如永定河下口勘定改移留溫承惠在工幫同辦理

否則仍回京供職欽此查永定河改移下口經戴均元
與_臣會商現因民居過衆奏明停止辦理惟北七
工之二十四號漫口必須堵築八月內卽當興工
永定河道李于培心地端正辦事謹慎支發錢糧
清楚節省兩月以來各工員均極信服第該員從
未經歷堵築口岸工程究欠熟練更兼_臣亦非諳
習河務且有通省應辦地方事件甚多不克常川
駐工實有難以兼顧之勢查溫承惠在直年久熟
悉永定河情形節次辦過漫口極爲妥速合無仰
懇

聖恩仍飭令溫承惠來工幫同臣辦理北七工漫口俟工竣之後回京供職不特工程可期妥速辦理不致多糜

帑項臣亦得專心辦理地方事件於公務均爲有益
謹

奏

嘉慶二十年八月初四日奉

上諭那彥成奏查勘永定河北七工第十號並非漫口並
叅處疎防之廳汛各官一摺此次北七工第十號漫溢
處所係因溜勢陡長於隄埵上過水未成缺口該道李

于培照漫口具稟係因不諳河工形勢著加恩免其議處卽將第十號漫口罰令填築堅固不准開銷該管廳員三角淀通判鄭以簡汎員東安縣主簿邱鳳梧兩次失防實屬疎玩均著革職留工効力俟漫工堵合後再行核辦其北七工二十四號漫口卽日興工堵築著溫承惠前赴工次幫同李于培妥協辦理工竣後回京供職

嘉慶二十年八月二十八日

奏爲勘辦永定河北七工漫口情形並挑挖引河鑲築兩壩開工日期恭摺奏

聞事竊查永定河北七工本年六七月間兩次漫溢經

先後勘明節次奏蒙

聖鑒在案

臣於本月二十三日在天津審案完竣後卽於

二十四日馳抵工次溫承惠先於十四日到工所有應挑引河及堵築漫口事宜已與該道李于培

等確勘妥議茲

臣到工後復與溫承惠帶同該道

李于培及廳汎各官詳加履勘水勢自西折而向北直注口門已成入袖之勢刻下情形似應在西壩之上築挑水大壩一道逼溜東趨並於現在迎溜坐灣處所挑引河一道始成吸川之勢惟估做

挑水大壩等工需項較多經費有常不得不撙節
辦理臣與溫承惠等再四熟籌此後水勢有落無
長若引河形勢順利挑挖深通將來開放亦可得
力挑水壩工程應行節省勘明卽在舊河身稍南
離東壩畧遠地方挑挖引河該處間段尚有河形
較爲簡易隨由引河頭迤邐而下直至黃花店以
東至西洲止共應挑引河長五千六百零九丈估
挑口寬二十四丈至三丈不等底寬一十八丈至
一丈五尺不等深一丈二尺至三尺不等至口門
原寬六十四丈刷溜勢掣涸現在水口僅寬四十

一丈水深八九尺至一丈七八尺不等其掣涸之
二十三丈悉成旱口用土夯築固屬節省第浸淹
後土性已屬鬆浮若不從新另做難期堅固必須
刨挖深槽節節多用軟草秸料鋪底逐細鑲填一
律進占以免溜勢搜根方臻鞏固現在溜勢向口
門直注形已入袖堵合較爲費手必須緩緩鑲做
步步穩實方保無虞且引河頭貼近東壩不宜多
做擬東壩進占七八丈西壩進占五十餘丈以順
其東注之勢於合龍較易爲力臣現將引河劃分
段落派員領銀挑挖其東西兩壩掌壩文武各官

以及支發銀兩購買料物催河收料跑牌買土彈壓巡查各委員共需文武一百餘員均已逐一調集公同派定諏吉於二十五日敬祀

河神集夫興工至此項工程前經

臣

奏明攜帶鹽飭加

價生息銀三萬兩永定河道庫存貯新舊防險及河淤地租並各員賠項共銀五萬餘兩統計八萬餘兩儘此數目已足敷用無庸另行籌酌茲

臣與

溫承惠督率再加節省辦理總期工歸實用

帑不虛糜仍隨時稽查勒限嚴工仰紓

垂厯再

臣

查口門河槽甚深堵合之後倘遇水勢盛漲隄

身必致喫重臣與溫承惠等商酌擬於合龍後築
月堤一道鑲做魚鱗埽以爲重門保障並將北七
北八兩汎堤身卑矮殘缺之處一律加高培厚用
資保護以上二條統於善後工程內另行確估奏
請辦理至第十號漫口已經該道李于培罰賠填
築堅固北六工廢堤缺口亦據該道修築完固以
資捍衛謹

奏奉

硃批覽

嘉慶二十年九月二十一日

奏爲永定河北七工二十四號漫口合龍恭摺馳奏仰

慰

聖鑒事竊查永定河北七工二十四號漫口原寬六十四丈及八月間臣與溫承惠先後到工會同履勘因溜勢掣澗水口僅寬四十一丈水深八九尺至一丈七八尺不等其餘二十三丈悉成旱口當將籌辦情形及應挑引河地方丈尺詳晰商酌一面剴調文武員弁飭遵趕辦一面奏蒙

聖鑒並聲明臣遵例上差扈

蹕所有工次一應事宜交溫承惠督同道廳各員弁迅速

築辦在案臣於十七日送

駕後遵

旨於十八日馳回省城茲於二十一日據溫承惠報稱會同永定河道李于培自八月二十五日開工以來在工文武員弁兵夫均各踴躍從事晝夜不懈引河共長五千六百零九丈分派二十四段於九月十二三四五日一律挑完深通知式東西兩壩察看大溜向北情形分別多寡丈尺以次進占隨時加壓大土務期步步堅實占占穩固邊岸後該亦隨時鑲做以資護衛口門愈收愈窄溜勢愈制愈

深自初十日以後測量埽前水勢已深二丈二三尺至二丈四五尺不等迨十八日又陡長水數尺金門刷跌愈深測量竟深至三丈六尺僉稱此次永定河水勢之大爲從來所未有波濤激怒猛湧異常於十八日戌刻西壩陡蛰數占勢甚危險幸料物寬裕人夫雲集溫承惠與李于培督率文武掌壩及在工職事一百餘員分投催運料土加鑲追壓不令片刻停留西壩甫經平穩溜勢向東側注東壩又復陡蛰隨蛰隨鑲亦俱保護無虞壩外水勢激溜兩壩屹立不動其時西北狂風大作立

將撲堤怒浪捲注東南直射引河方位溫承惠察看情形於開放引河事機極其順利時已十九日寅刻立將引河頭所留土埂起除開放風捲水趨星馳電掣建瓴直注迅於飛瀑怒濤數刻之間已將五千六百餘丈之引河全行鋪滿直達尾間勢甚通暢埽前水勢立刻消退二丈餘尺卽於卯時掛纜合龍員弁兵夫倍加歡欣踴躍竭一晝夜之力於二十日卯刻已堅實穩固毫無涓滴滲漏壩前業已停淤全河悉歸故道臣接閱之下不勝敬悅此皆仰賴

皇上洪福

河神默佑得於二十餘日之內迅截要工俾居民悉行
復業兩岸臚歡頌聲匝地所有合龍穩固情形理
合飛速馳

奏仰紓

聖廕至該工善後事宜

臣

現已札致溫承惠督同道廳確

切估計於明春另行辦理在工大小各員卽令回
任回省以節糜費此次大工用銀數目因大壩邊
埽後搶正在鑲做尚難截數總計在五萬五六十
兩以內

臣

現亦札致溫承惠俟工竣截數趕緊確

實覈報至臣統俟恭祝

萬壽由京回省之時再行會同溫承惠前往工所收工臣
接據溫承惠報稱此次李于培在工總理晝夜辛
勤不辭勞瘁經手錢糧慎重節省毫無糜費臣查
該員不諳河務業經奉

旨降一級以知府留於直隸補用但該員持品端正辦事
結實認真實爲可信臣不揣冒昧仰懇

聖慈可否將該員李于培

賞准開復道員仍留直隸補用之處出自

皇上逾格天恩至北岸同知張泰運此次掌理東壩晝夜

在工奮勉勤慎一切堵築事宜深資其力南路同知許嗣容承辦引河頭易州知州金洙承辦兩段引河均係難辦之工該二員奮勉挑挖極爲迅速以上三員均屬超衆出力應一併籲懇

聖恩將北岸同知張泰運

賞加知府銜南路同知許嗣容易州知州金洙

賞准以應陞之缺陞用俾示鼓勵此外尚有在工出力文

武員弁容俟

臣

會同溫承惠確實查明另行奏請

施恩至溫承惠此次駐壩督工勘辦精詳擘畫老練錢糧

旣不致糜費要工亦得迅速成事

臣

不敢壅於上

聞惟係大員應如何

施恩之處出自

聖主鴻慈恭候

睿裁謹

奏

嘉慶二十年九月二十三日奉

上諭那彥成奏永定河北七工漫口合龍一摺此次堵築永定河漫工口門水勢尚深至三丈有餘東西兩壩經各工員晝夜鑲壓穩固引河暢順一舉合龍二十餘日通工告蒞辦理尚爲妥速李于培著加恩開復道員仍

留直隸補用北岸同知張泰運著賞加知府銜南路同知許嗣容易州知州金洙俱以應陞之缺陞用以示獎勵

嘉慶二十年九月二十三日軍機大臣字寄奉

上諭甘肅按察司著屠之申補授大名道員缺著程卓樑補授李于培著加恩開復道員仍留直隸補用北岸同知張泰運著賞加知府銜許嗣容金洙俱以應陞之缺陞用以示獎勵

嘉慶二十年十月十二日

奏爲驗收永定河北七工堵築各工均屬穩固並會勘

善後緊要工程先行趕辦事竊

臣

陛辭後由京會同溫承惠於初十日馳抵永定河工次將堵築各工段逐一驗收鑲做俱極穩固丈尺亦俱符合河流順軌下注暢達所有善後應辦緊要各工因漫口新築工段土性純沙轉瞬積凌下注甚屬堪虞先經溫承惠於堵築大工之時親身查看情形所有應行添築挑水順水各項壩工土格月堤並幫做內搶填補深塘溝槽以免引溜生工至臨河險要處所均酌量鑲做磨盤裹頭防風埽段

臣當卽飭令該道李于培督率廳員酌量緩急確

估趕辦以資抵禦茲據該道開單呈送共估需銀
六千五百四十七兩零五分二釐臣等按照單開
各工詳細履勘所有壩堤埽段均係最關緊要刻
不可緩之工核計所估銀數尚無浮多該道李于
培現已督率廳汛辦至四五分不等臣飭令該道
廳等務於上凍以前一律趕辦完竣另案請銷謹
將工段丈尺銀數開列清單恭呈

御覽至北七北八兩工迤邐四十餘里向係無工處所並
無歲搶修稽料近年以來河溜北趨已成險工必
須預購稽料以備來歲伏秋大汛搶修之用臣等

悉心籌酌應

奏明請

旨俯准按照例價購備稽料二十五垛責成該道廳核實
採辦存貯該工以資要需再查北七北八兩工堤
身向係卑薄本年雨水過多衝刷殘缺之處在在
均須培築其餘南北兩岸臣於本年周歷各處節
次詳細勘驗均有低薄衝刷應行加培疏濬處所
臣現飭該道李于培逐加勘估容俟核明於來春
興工奏辦伏乞

皇上睿鑒訓示再

臣

於拜摺後卽赴天津閱兵溫承惠卽

回京供職謹

奏奉

硃批依議該部知道

謹將永定河北七八兩工善後應估築挑水順水
各項壩上土格並幫內搶填補深塘溝槽及臨河
應做磨盤裹頭防風埽段工程土方工料並預購
防料銀數繕具清單恭呈

御覽

計開

北七工汛內

二十四號估築順水雞嘴壩一道長六十四丈

估土三千八百八十七方三尺五寸

遠越遠土

又順堤舊河形估築攔入土壩一道長四十

三丈估土一千五百四十八方

遠越遠土

又金門後月堤長八十四丈估土二千九百

四十方

遠越遠土

二十四五號內灘衝成溝槽殘缺多處恐汎水

盛漲引溜生工應填補與灘面相平以資

保護內共計一十二處估土七千八百一

十二方七尺一寸二分五釐

遠越遠土

又自二十四號尾起至北八工頭號止搶築

月埕一道長三百六十丈估土二千二百

五十方

遠越
遠土

二十五號內幫填補深槽並幫內鈔長三十七

丈估土二千四百零五方

遠越
遠土

又估築順水壩二道內

一道長三十九丈並填溝槽估土一千八

百二十九方九尺三寸七分五釐

遠土
遠土

又一道長三十丈並填溝估土一千零七

十二方五尺

遠土
遠土

北八工汎内

三號臨河甚近堤身單薄堤根又有稀淤深塘

估内幫長十七丈並填深塘估土二千三

百六十三方

遠越
土

又西首殘缺長六丈估土二百一十三方七

尺五寸

遠越
土

九號北股近堤河形通連新挑河應築攔河土

格二道内

一道長二十丈高與二坎相平又加高一

尺長三十一丈與老坎相平估土四百

零五方二尺五寸

遠土

又一道長二十四丈加築與老坎相平估

土二百一十方

遠土

十號內圈堤頭土壩一道長六十五丈估土一

千二百八十六方一尺一寸五分

遠土

又河形內估土格二道共長五十五丈估土

二百八十八方七尺五寸

遠土

十一號內圈堤尾土壩一道長六十五丈估土

一千三百九十三方七尺五寸

遠土

以上北七八兩汎通共估土二萬九千

九百零六方一尺一寸五分共計銀
五千五百六十七兩五錢九分七釐
應鑲做各埽段

北七工

二十四號內雞嘴挑水壩一道西長三十六丈
五尺軟鑲寬二丈高五尺又東長二十三
丈軟鑲寬一丈三尺高五尺除壓土外上
又加鑲寬一丈二尺高六層又鑲護壩裏
頭埽圍長十丈零六尺高九尺寬一丈三
尺鑲墊十一層

又順堤舊河形攔河壩西面下防風埽長三十丈高四尺又接前臨河應攸磨盤埽下高一丈面埽長十丈下高九尺肚埽長九丈五寸均寬二丈三尺鑲墊十三層

北八工

二號內順水舊土壩應下裏頭埽長六丈五尺高九尺寬一丈二尺鑲墊十一層

三號內順水舊土壩應下裏頭埽長六丈高九尺寬一丈三尺鑲墊六層

以上北七八兩汛各埽段防風共估銀

九百七十九兩四錢五分三釐二毫
連築土壩土格加堤工內戩填補深塘
溝槽通共估銀六千五百四十七兩
零五分二釐

又預購北七北八兩工防料二十五萬束每
束例價銀八釐共該銀二千兩

嘉慶二十年十月初三日

奏爲查明永定河辦工出力人員恭摺保奏籲懇

恩施事竊照本年六月下旬永定河北七工異漲泛溢致

成漫口

臣欽奉

諭旨會同溫承惠駐工勘辦已於九月十九日合龍專摺

馳

奏聲明工次實在出力各員弁查明確實另行保奏在

案伏查此次堵築事宜所有鑲做大壩挑挖引河

稽查督催等項在在均關緊要臣檄調文武共一

百零數員來工趕辦係屬一氣呵成工段皆同時

並做錢糧又務從節省該員等均能奮勉急公辦

理妥速臣於初一日行抵蘆溝橋會同溫承惠飭

令道廳將此次用銀總數確實核計共用銀五萬

五千四百九十七兩八錢九分七釐除臣等應賠

銀二萬二千一百九十九兩零例應銷銀三萬三千二百九十八兩零所有工段丈尺用銀細數另開清單恭進

御覽其挑挖引河各員除現任州縣外有緣事降革七員先經查核原案均係因公情有可原者且均係直隸原官並非外省投効可比是以准令承挑各員等實心出力晝夜趕辦均能於十五日之內將所派各段引河一律挑完深通如式且所領土方例價因僱夫趕工辦理均多賠墊現值工竣該革員等不敢妄邀甄敘情愿照例由臣奏請捐復留於

直隸補用共計捐項二萬一千六百三十六兩於
派令承挑之先卽飭該革員等措繳道庫茲臣與
溫承惠會同查核道廳開送各單逐一詳細確核
謹擇其實在出力者文武共二十三員開列清單
敬呈

御覽合無仰懇

聖慈分別

施恩以示鼓勵至漫口之後

臣

將專管廳汛叅奏革職協

防各員奏請摘去頂戴留工効力此次該員等在
工効用均尚認真勤慎且查河工漫口堵合之後

有准予開復原官之例應請將協防北七工先經
奏請摘去頂戴之河間府同知王履泰試用通判
單應魁試用縣丞汪兆鵬三員請

旨開復頂戴其專管之已革三角淀通判鄭以簡已革東
安縣主簿邛鳳梧二員汎內漫口本係無工處所
可否仰懇

聖慈將鄭以簡降等以州同用邛鳳梧降等以巡檢用之
處出自

逾格天恩是否有當伏乞

皇上

睿鑒訓示再查此外尚有辦工出力人員容臣另行造冊

咨部議敘謹

奏

謹將永定河北七工二十四號堵築漫口鑲做大
壩挑挖引河等項用過銀兩及銷賠數目開具清
單恭呈

御覽

一兩壩逐日進占東壩水工軟鑲八丈西壩旱灘
挖槽軟鑲二十三丈又水工軟鑲三十丈龍門
三丈共六十四丈臨河邊埽十三段計長六十

四丈連後截六十四丈共計料物夫工用銀一萬九千七百四十二兩零

一大壩以下挑挖引河計長五千六百零九丈共用銀三萬五千七百五十五兩零

以上大壩引河二項統共用銀五萬五千四百九十七兩零例應銷六賠四計應銷銀三萬三千二百九十八兩零應賠銀二萬二千一百九十九兩零

嘉慶二十年十月初三日奉

上諭那彥成奏查明永定河辦工出力人員懇請施恩一

摺此次永定河堵築漫口辦理迅速各工員尚屬奮勉
加恩著照所請保定府同知汪河永定河南岸同知孫
豫元定州直隸州知州張孔源候補同知張承勲俱賞
加知府銜河間府知府彭應杰交部從優議敘候補同
知沈華旭准其捐復知府原官蔚州知州張道渥豐潤
縣知縣杜懷瑛內邱縣知縣李鈐以應陞之缺陞用候
補同知袁烺候補通判馮德岫俱改撥河工儘先補用
候補同知管文愷候補縣丞袁修敬黃翰候補從九品
陳裕俱改撥河工候補縣丞陳選候補從九品潘洞候
補未入流殷璋賈昶俱儘先補用都司謝成賞加遊擊

銜守備李存志守備銜河營協備夏芳茂俱賞加都司
銜千總宋培賞加守備銜河間府同知王履泰候補通
判單應魁候補縣丞汪兆鵬俱開復頂戴已革通判鄭
以簡降等以州同補用已革縣丞邱鳳梧降等以巡檢
補用捐復知縣王餘師准其留於直隸補用王奎聚蔣
兆璠沈守恒張洽儲斗南翁新福董鴻俱准其捐復原
官仍留直隸補用該部知道

嘉慶二十年十月十二日

奏爲永定河廳員經管汛段酌籌改移並請遴員對調
以專責成而裨要工事竊查永定河南北兩岸綿

亘三百餘里汎段延長險工林立每遇伏秋大汎
搶修之時必須專管廳員呼應靈便不致顧此失
彼方足以資捍衛而專責成且河流變遷靡常今
昔平險互異尤應隨時酌籌調濟務使人地相宜
以期有裨要工向來額設石景山同知南岸北岸
同知並三角淀通判共計廳官四員石景山同知
專管兩岸石工南岸同知專管南上南下南二南
三南四南五南六共七汎南七南八南九三汎則
歸三角淀通判管理北岸同知專管北上北中北
下北二北三北四北五北六共八汎北七北八二

汎亦歸三角淀通判管理惟查石景山向係兩岸
石工均極鞏固別無要工南岸同知管理七汎北
岸同知管理八汎一遇搶險每致鞭長莫及至三
角淀通判駐劄北七工管理北七北八兩汎又須
越河經管南七南八南九三汎董率策應往往勢
難兼顧而北七北八從前祇係平工近年已成險
要更須專員加意防護方可不致貽悞臣與溫承
惠及道廳等悉心商酌惟期於事有益不如量爲
改移相應據實

奏明請將石景山北岸石工仍歸石景山同知管理並

添管接連之北上北中北下北二共四泚其北三
北四北五北六北七北八共六泚請俱歸北岸同
知管理石景山南岸石工改歸南岸同知管理仍
管接連之南上南下南二南三南四共五泚其南
五南六南七南八南九共五泚請均歸三角淀通
判管理如此酌爲改易泚段旣不致歧紛呼應似
爲較靈如蒙

俞允所有石景山同知一缺查有現任務關同知田宏猷
曾任北岸同知熟悉該工情形請將現任石景山
同知丁寶洲與該員田宏猷對調三角淀通判一

缺查有現任滄州通判陳春熙原係北岸同知降
補通判工程甚爲熟諳請將現任三角淀通判宋
綸光與該員陳春熙對調如此一轉移間人地均
屬相宜臣可資駕輕就熟之效於要工實有裨益
至該廳等改移泚段一切事宜容臣另行具

題謹

奏奉

硃批吏部議奏

嘉慶二十年十一月十三日

奏爲永定河北七工等泚應辦善後土埽各工據報趕

辦完竣恭摺奏

聞事竊

臣

前在永定河工次驗收堵築工程飭令該道李

于培將北七工北八工兩汎應辦善後緊要土埽
各工共估銀六千五百四十七兩零五分二釐當
經臣詳細勘明令卽督率廳汎等務於上凍以前
一律辦竣並請按照例價購備稽料二十五垛以
爲該工兩汎來歲搶修之用繕具清單奏蒙

俞允在案茲據該道李于培稟據南岸同知孫豫元北岸
同知張泰運稟稱北七北八兩汎善後土埽各工
遵照原估段落丈尺一律如式趕辦於十一月初

一日完竣該道覆查無異至兩汎應備稽料二十五垛亦經該道照數發給銀兩派員採辦等情具稟前來謹

奏奉

硃批工部知道

嘉慶二十一年正月十六日

奏爲查明永定河石景山南北兩岸並北七北八兩工應行加培疏濬工程確核估計恭摺具奏事竊照永定河石景山南北兩岸並北七北八兩工堤身卑薄兼多被水衝刷殘缺過甚亟應加培疏濬以資

捍衛前經臣於驗收北七工堵築工程案內

奏明飭辦在案嗣該道葉觀潮抵任後臣卽將現在情

形備細告知復飭該道確實估計茲據勘明石景

山東岸石堤三段因本年水勢盛漲溜走堤根致

被衝刷坍塌必須補砌完固其南北兩岸並北七

北八兩工因下游日漸淤高堤身又復卑矮且有

被水衝蝕及溝槽老坎均應填築疏挑並間段添

築土壩隨勢添創新堤方可以資捍禦惟工段綿

長需用太繁謹擇其必不可緩之工估計辦理共

應需銀三萬八千二百零六兩八錢八分七釐零

開單稟請具

奏前來

臣

伏思辦理河工藉堤以禦其衝亦資壩以紮

其勢並將河身老坎裁挑通暢使水勢安流順軌
庶堤工可期鞏固自應乘時亟爲補苴庶有備無
患現據該道勘估各工與臣前在工次履勘情形
相同質係應辦要工所估疊次核減亦尚撙節倘
蒙

俯准俟

命下之日卽在藩庫動支銀兩責成該道葉觀潮督率廳
汛各員弁一俟春融興工趕辦務於汛前一律完

竣臣仍親往嚴查驗收倘有草率偷減立即據實
叅辦統俟驗收後造冊

題銷謹

奏奉

硃批工部議奏

嘉慶二十一年二月二十五日

奏爲恭報永定河凌汎安瀾仰慰

聖懷事竊照永定河工段綿長溜勢湍急前因凌汎屆期
經臣飭令該道葉觀潮督率廳汎各員駐工防護
茲據稟稱本年驚蟄以後天氣融和全河水凌泮

解水流勢急兩岸埽工間有垂蟄之處隨即督率
員弁兵夫立時加鑲穩固下口大溜北趨北七北
八兩工堤根經凌汎水勢浸漾汪洋一片亦即捆
把簽釘並趕築土格以資抵禦現在各工穩固於
本月二十一日全河水塊融化淨盡河流暢順安
瀾等情具稟前來臣仍飭該道督率各廳汎員弁
實力巡防不可因凌汎已過稍存大意並將本年
估辦兩岸加培等工乘時趕辦務於大汎前一律
完竣不任稍有草率遲悞謹

奏奉

硃批知道了

嘉慶二十一年六月十三日

奏查永定河南北兩岸本年應辦各工經臣於上年冬

間週歷詳勘將一切加高培厚預備大汛各工程

奏准於本年春融後俱責成該道葉觀潮督飭分投興

辦茲據稟報完竣且伏汛將屆應卽前往驗收第

查該道葉觀潮本係熟習修防之員所有另案各

工自興辦以後節經派委員弁密加稽查隨時暗

訪該道均能認真如式督辦其預籌防護各事宜

亦據該道節次稟明指示妥備並據稟稱本年永

定河下游水勢順暢遵估修辦各工俱合機宜似
係實在情形尚無必須臣前往查驗之處現值暎
咭喇國遣使臣入

貢該使船於夏至以後一過洋面西南風順即可迅速
駛抵天津爲期既屬緊迫必應先將迎護照料一
切趕緊分飭司道鎮將等妥速備辦臣擬卽在省
垣探候該使船如有到津確信在省較近以便兼
程馳往照料所有永定河查驗各工之處似可酌
量暫緩謹

奏奉

殊批甚是

嘉慶十一年五月二十四日

奏爲恭摺奏

聞事竊

臣

前在開州曾經大名道屠之申面稟大名府屬

北有漳河南有衛河兩水環抱自西趨東至山東
館陶縣地方始行合流乾隆五十九年間漳河水
勢漲發突由府西河南臨漳縣三臺村地方向東
南改道奔溢至內黃縣之豆公村穿入衛河衛清
漳濁不克抵禦以致衛河之水倒漾不能暢行於
上游南岸缺口淹及大名府南大名南樂清豐等

縣七十餘村莊地畝頻年淹浸糧賦緩徵等情臣
卽面諭該道訪查民情履勘形勢妥實辦理今據
該道稟稱帶同大名府同知謝賜翰逐一履勘擬
將漳河之水引歸故道然後衛河之水始可亦歸
故道但漳河故道及衛河缺口處所淤沙有十餘
里集夫挑挖需費甚鉅且衛河缺口須高築堤埝
方可以免泛濫工程旣大地屬河南猝難辦理爲
今之計惟有將積水設法疏消以甦民困復率同
謝賜翰沿河履勘應自大名縣之北善村清豐縣
南留固第六居等處照依盛漲時順流溝形挑挖

深通將積水洩注潭坑引入黃河故道由元城縣
小灘地方仍歸河路但工段綿長經費不易該道
面詢被水各村莊民人僉稱情願自行出夫分段
挑挖懇請官爲彈壓等情並繪具圖說稟請核示
前來臣查大名清豐南樂三縣因衛河缺口水勢
旁趨致淹七十餘村莊頻年爲患自應設法疏濬
俾積水得以消涸地畝漸可耕鋤旣據該民人等
自願出夫挑挖應如所稟辦理臣已責成該道居
之申按照各村被淹地畝多寡均勻出夫劃定段
落迅速興挑並委同知謝賜翰漳河縣丞高孝基

稽查彈壓一面令該道先行出示曉諭俟挑竣之日具報查核仍嚴禁胥吏人等藉端滋擾謹

奏

嘉慶十九年五月二十六日軍機大臣字寄奉

上諭那彥成奏大名清豐南樂三縣疏濬積水情形一摺大名等縣七十餘村莊地畝前因衛水倒漾頻年淹浸茲據各村民人情願自行出夫挑挖並請官爲彈壓積水淹浸田畝鄉民自願疏消以利耕種自應俯順輿情令其興辦該督並飭知地方官妥爲彈壓勿令書吏人等藉端滋擾至該處與豫東兩省毗連人夫聚集之時

易於藏奸現在未獲要犯祝現等及次要犯共六十餘名或溷跡其中亦未可定那彥成並密飭該道府州縣及委員等留心察訪遇有形跡可疑之人卽詳加盤詰勿稍疎漏

嘉慶二十年八月二十三日

奏爲委員驗收天津靜海二縣挑濬引河並加培疊道修建橋閘等項工程恭摺具奏事竊查天津縣南窪舊有引河八道橫河一道宣洩瀝水導入海河又自東關外起至鹹水沽止有海河疊道綿長五十餘里堵築海河盛漲建立橋閘設官專司啟閉

前因年久失修引河淤塞壘道單薄間座殘缺以致南窪漚水無從宣洩漫溢六十餘村又靜海縣西鄉子牙河故道係宣洩河間獻縣交河三縣漚水由老君泊至第三堡各引河入子牙正河由天津西沽入海河歸海其故道河東舊有東堤一道接連賈家口橫堤以重漳運保護民田前因嘉慶六年大水後各河淤塞兩堤間投刷平漚水下注故道東堤殘缺不能捍禦西鄉八十餘村全被淹浸據該二縣士民懇請修辦據前任天津道李鑾宣帶同委員履勘擬將天津縣南窪馬家口等處

引河六道挑挖深通照舊修建木橋六座石閘六座攔水草壩十二道疊道間段加培共估需銀三萬七千五百三十餘兩其靜海縣境內先將第三堡等處引河四道挑挖深通使水歸子牙正河再將故道河身疏濬東堤並賈家口橫堤修築堅實添建木橋二座共估需銀五萬一千三百四十餘兩由前任藩司方受疇覆核具詳前督臣溫承惠奏請動用長蘆運庫鹽餉加價銀兩辦理仰蒙

俞允嗣因天津縣馬家口村內引河二道水涸之後露出墳塚不便挑挖奏明將馬家口引河二道木橋二

座石閘二座停止請改挑束關閘引河一道並修復石閘一座木橋二座又將攔水壩停止另行開濬橫河一道添建木橋四座連前共估需銀四萬七千三百二十七兩零欽奉

硃批工部知道欽此欽遵在案嗣據靜海縣將第三堡等處河道挑挖深通堤工修築堅實添建木橋二座具報於嘉慶十八年十月十三日工竣飭委前任清河道魯銓驗收實係照估如式一律完竣並無草率偷減其西鄉被淹各村全行涸出又據天津縣將引河橫河挑挖深通壘道加培結實修建石

開五座木橋十座具報於嘉慶十九年六月十三日工竣被淹各村全行涸出其東關開引河共二千零八十九丈內太平莊至八里臺祇一段原估一千四百丈該縣裁灣取直實挑挖一千二百一十丈當經飭委前任天津道李鑾宣查驗前項引河五道橫河一道內賀家口引河一道幫土浮鬆挑竣後被雨衝淋尺寸不足疊道被雨淋殘木橋間有椿短板薄石閘板片亦有不敷應飭令補挑加培並將橋閘椿板更換添補再行驗收稟經臣嚴飭趕辦完竣檄委現任天津道驗收去後茲據

該道張五緯稟稱馳赴各該處逐段驗收所有賀家口何家圈雙港閘白塘口等處引河四道又東關閘引河一道又橫河一道現俱瀝水盈槽除東關閘引河自太平莊至八里臺一段因裁灣取直照原估少挑一百九十丈外其餘長寬丈尺均與原估相符其河身深淺因節經雨水該處土性鬆浮不無積淤海河疊道加培丈尺亦與原估符合橋閘等工均係堅厚如式係一律完竣並無草率偷減情事稟覆前來臣伏查天津縣南窪附近六十餘村莊靜海縣西鄉八十餘村莊因河道淤

奏
塞瀝水無從宣洩廬舍民田皆被其患仰蒙

聖主恩施無已連歲緩徵茲復蒙

恩賞撥銀兩將該二處引河挑挖深通疊道堤工一律加
培結實並修建橋閘以資宣洩捍衛據清河天津
二道驗明各工均已照估如式辦理完竣被淹地
畝均已涸出小民得登衽席之安渥沐

鴻慈無不同聲臚頌並飭取冊結照例

題銷謹

奏奉

硃批知道了

嘉慶二十年十一月二十五日

奏爲北運河應行建築堤壩各工奏明動項興修並將
妄估率詳之道廳各員叅奏請

旨事竊查北運河受白潮溫榆通惠諸河之水建瓴而下
袤長三百三十餘里爲糧艘經行要道源高脈廣
溜急灘多全賴兩岸堤壩鞏固收束水勢漕運方
能遄速而附近民田廬舍亦可藉資保障工段綿
長處處皆關緊要自乾隆三十五年

欽差勘定動項修築迄今四十餘載嘉慶六年及十三年

大水之後均經前督

臣

奏明另案興修添建堤壩挑淤開河等工不過祇就彼時險要之工撙節辦理其每年額設歲修銀兩定有限制止係擇要補苴本年伏秋汎內大雨連綿山水漲發兩岸堤埽各工多有衝刷殘缺在在堪虞若不及早籌辦恐來年大汎難資保障先據通永河道葉紹本詳據務關同知田宏猷署楊村通判沈旺生稟稱務關廳屬挑河建壩築堤實估需銀一萬三千九百三兩八錢一釐楊村廳屬挑河建壩築堤實估需銀一萬二千九百九兩六錢七分一釐二共估需銀二萬六千八百九十四兩

零稟請興辦等情

臣

查北運河堤壩原係保護居

民利濟漕運如有殘缺處所自應及時修築惟要
工固須籌辦仍須分別緩急核實勘辦計原估銀
數較之嘉慶七年及十四年另案銀數均屬浮多
隨嚴飭永定河北岸同知張泰運前往會同務關
同知田宏猷再行詳加履勘何處應急何處應緩
確切據實刪減分別估計去後茲據張運泰等會
稟務關廳屬原估挑河各工楊村廳屬原估挑河
格堤各工均尚可從緩今勘明務關所屬添建月
堤一道草壩一段楊村所屬添建月堤一道草壩

四段俱係迎溜埽灣堤身坍塌過甚實屬極險要
工刻難緩辦按段估計共需工料銀九千四百九
十五兩六錢七分二釐繪圖開單稟請核辦前來
經臣復加確核委係應辦要工所估銀數較前實
爲節省應請准其估辦所需工料銀兩請在於通
永道庫貯歷年扣平飯銀項下動撥如蒙

俞允俟

命下之日卽飭令通永河道督同該廳等先行動項購備
料物運貯工所俟春融認真趕辦勒限完竣臣親
往驗收務使工歸實用

帑不虛糜庶於河道民生兩有裨益理合開具工段丈尺銀數清單敬呈

御覽至原估之務關同知田宏猷署楊村通判沈旺生於尚可緩辦之挑河各工概行估計以致所估銀數比較從前另案均屬浮多實屬妄估該管通永河道葉紹本並不確切覆勘率詳請辦亦屬不合相應隨摺據實叅

奏請

旨將務關同知田宏猷署楊村通判沈旺生通永河道葉紹本俱交部議處以爲不能實心估辦者戒謹

奏

謹將北運河務關楊村兩廳另案草土各工段落
丈尺銀數繕具清單恭呈

御覽

計開

務關廳屬

莊河村北險工添建月堤一道長三百五十丈頂
寬二丈底寬七丈均高一丈每丈合土四十五
方共合土一萬五千七百五十方每方銀一錢
三分

估銀二千零四十七兩五錢

木廠村草壩南險工添建順水草壩一段長七十丈均寬一丈八尺均高二丈五尺內下用高七尺埽一進

估銀二千七百六十三兩六錢五分一釐

以上務關廳屬草土工共估銀四千八百十一兩一錢五分一釐

楊村廳屬

火燒屯村南險工添建月堤一道長一百三十丈頂寬二丈底寬七丈均高一丈每丈合土四十

五方共合土五千八百五十方每方銀一錢三分

估銀七百六十兩零五錢

磚廠北險工添建草壩一段長二十丈均寬一丈八尺均高二丈七尺內下用高七尺埽一進

估銀八百三十四兩六錢

陳官屯南險工添建草壩一段長五十丈均寬一丈七尺均高二丈五尺內下用高七尺埽一進
估銀五百七十九兩三錢零八釐

寶家營前險工添建草壩一段長三十五丈均寬

一丈七尺均高二丈五尺內下用高七尺埽一進

估銀一千三百五十一兩五錢八分九釐

辛莊南險工添建草壩一段長三十丈均寬一丈七尺均高二丈五尺內下用高七尺埽一進

估銀一千一百五十八兩五錢二分四釐

以上楊村廳屬草土工共估銀四千六百八十四兩五錢二分一釐

以上務關楊村兩廳各工共估銀九千四百九十五兩六錢七分二釐

嘉慶二十年十一月二十七日奉

上諭那彥成奏北運河建築堤壩各工奏明動項興修並
將妄估率詳之道廳叅奏請旨一摺北運河堤壩各工
前據該道廳等詳報挑河建壩築堤各工務關廳屬估
需銀一萬三千九百兩零楊村廳屬估需銀一萬二千
九百九十兩零經該督委員覆勘其原估挑河格堤各
工均尚可緩辦惟務關所屬添建月堤一道草壩一段
楊村所屬添建月堤一道草壩四段俱屬極險要工共
估需工料銀九千四百九十五兩六錢七分二釐較前
實爲節省著照所請卽於通永道庫存貯歷年扣存平

餘項下動撥飭令該道廳先行購備料物運貯工所俟
春融趕辦勒限完竣屆期由該督親往驗收務期工歸
實用至原估之務關同知田宏猷署楊村通判沈旺生
於尚可緩辦各工概行估計以致銀數比從前另案浮
多該管通永河道葉紹本並不確切覆勘率詳請辦俱
著交部議處

嘉慶二十一年六月十三日

奏爲委員驗收北運河添築堤壩工程一律完固事竊
北運河受潮白溫榆通惠諸河之水袤長三百三
十餘里爲糧艘經行要道全賴兩岸堤岸鞏固收

束水勢漕運方能遄速附近民田廬舍亦藉資保障上年伏秋汎內大雨連綿山水漲發兩岸堤岸各工多有衝刷殘缺在在堪虞前據通永道葉紹本轉據務關同知田宏猷署楊村通判沈旺生詳請動項興辦臣隨委永定河北岸同知張泰運前往會勘分別緩急據實估計勘明務關廳所屬添建月堤一道草壩一段楊村廳所屬添建月堤一道草壩四段俱係迎溜掃灣堤身坍塌過甚實屬極要險工刻難緩辦共估需工料銀九千四百九十五兩零經臣開具工段丈尺奏請動項辦理

仰蒙

俞允遵卽飭令通永道葉紹本動撥銀兩責令該道督率趕辦嗣據稟報完工隨委天津府驗收去後茲據該府張大維稟稱馳往各處逐一驗收務關廳屬添建月堤一道草壩一段楊村廳屬添建月堤一道草壩四段均係照估如式一律完固並無草率偷減情事開具丈尺清單稟覆前來臣覆加確核均與原估相符現在嚴飭該管各廳員加意保護防守務期工程鞏固河道安流以仰副

聖主速漕利運之至意謹

奏奉

硃批知道了

嘉慶二十一年四月十八日

奏爲委員查勘滏陽河淤阻情形擬請挑挖以利舟行
恭摺具奏事竊照冀州並新河縣境內滏陽河道
爲長蘆商人運往正定趙州鹽船必經之所自乾
隆五十年間藁城縣廣陽堤廢之後滏水南趨攔
截入滏以致滏陽河身日漸淤塞嘉慶五年並於
十三年間兩次奏請挑挖無如滹沱河流遷徙靡
常且挾沙而行勢甚湍激所到輒淤總難收一勞

永逸之效上年准長蘆鹽政廣惠咨會以潞陽河
現又淤塞有礙鹽運請委員會勘估計興挑臣隨
委河工候補同知張承勲會同運同彭良敞冀州
知州范李逐細勘估去後茲據該員等稟稱緣近
年來潞沱河流至寧晉縣上槁村分爲南北兩股
北股由清善頭入邵村口滙溢下注南股由營疙
疸等村入新河縣葫蘆灣等村串入潞陽河向東
折而北注以致傅家莊至閻家寨一帶淤塞該員
等隨自潞陽河淤塞故道下口閻家寨起順河形
往上查勘至柏牙莊西止已成平陸又往上卽有

漳河傍溢之水隨又乘舟勘至新河縣境傅家莊
迤西較下段微有河形僅深數寸至尺許不等再
往上卽入正河直抵西葫蘆灣迤上一片汪洋平
地水深二三尺不等察看情形如將上槁村南股
岔河堵截使漳水全歸北股由邵村下注南股藉
以斷流易於洞復施工然上槁村北股亦無刷成
河槽附近村莊上年已被水災報明有案刻下地
漸涸出若將漳沱河全河之水截歸北股勢必又
致淹浸不但輿情不服且利此損彼亦非辦法今
擬自傅家莊迤西起至閻家寨止挑通正河一道

並於北岸築堤一道攔禦漳水庶往來舟楫可以
通行被淹地畝可以涸復共估需銀七萬二千零
一十二兩繪圖貼說開具估單稟送臣隨移商長
蘆鹽政廣惠詢之衆商僉稱情愿通綱捐辦請先
在於加價項下動支自二十二年起分作五年隨
引交庫咨覆前來臣查潞陽河爲蘆商運鹽要道
省南三十餘州縣民食所關自廣陽堤廢漳水南
徙之後頻年淤塞前經兩次奏請挑挖旋復淤阻
若欲漳水北趨非築復廣陽堤不可惟廣陽堤廢
圯已久前經勘明又難修復自應相度情形另籌

善策茲據該員等擬自新河縣境傅家莊迤西起至冀州境閻家寨止估挑正河一道計長四千零一十丈又自新河縣傅家莊迤西起至冀州境閻家寨止估築堤工一道計長四千一百五十丈以禦漳水臣檢核歷次舊案並詳加訪詢實係補偏救弊之計自應照議辦理所需挑河築堤土方工價銀七萬二千零一十二兩應請在於長蘆運庫加價項下先行動支自二十二年起蘆商按五年攤捐還款如蒙

俞允臣

再行知會廣惠將所需銀兩派令鹽務之員湏解

赴工一面由臣委員前往領銀承辦仍令鹽務之
員在彼稽查並委道府大員及地方官彈壓經理
務於大汛前一律趕辦完竣報候委員驗收倘有
偷減情弊卽行叅賠其挑河築堤盤出土所佔地
畝應納錢糧飭令該州縣查明造冊呈送臣移咨
鹽政飭令各商按年如數代爲完納交存運庫移
解藩庫彙入奏銷是否允協理合會同長蘆鹽政
廣惠合詞恭摺具

奏並繪圖貼說敬呈

御覽謹

奏

嘉慶二十一年四月十八日

奏查傅家莊以下至閻家寨止淦陽河道係正定趙州
兩屬引鹽經由之所其自傅家莊以上至河頭止
爲順德廣平兩屬運鹽之要路現據委員查勘該
處河身亦間有淺灘應行挑濬並擬於北岸接築
長堤以資抵禦現在水估礙難施工應俟水勢消
退再行勘估並據承辦順廣引地商人晉泉達等
呈請勘辦前來俟水勢消退會同廣惠委員勘估
另行奏辦謹

奏奉

硃批覽

嘉慶二十一年四月二十日軍機大臣字寄奉

上諭那彥成奏淦陽河淤阻勘請挑挖一摺淦陽河爲正
定趙州一帶鹽運所經現因淤阻艱於轉運自應勘估
挑挖惟直隸歷來挑河情形皆止挖成旱河而潦之時
畧具河形水勢消落則河底乾涸僅有半溝一道所以
但有興挑之費難收利濟之益此次該督所奏挑挖淦
陽河自傅家莊迤西起至閻家寨止挑通正河一道並
於北岸築堤一道攔禦漳水估需銀七萬二千餘兩如

此辦理之後是否舟楫足以通行常無阻礙抑越時卽不免淤阻仍屬有名無實著那彥成再確查情形據實覆奏如此次挑挖之後可有成效著照該督所請飭令興工趕辦並嚴察承辦之員務按原估丈尺開挖深通毋許絲毫偷減並另委大員驗收倘挑濬之後旋復淤阻卽將工項勒令分賠以示懲儆

容安謹按挑挖滏陽河並築堤禦漳一事奏稱時當積水未涸俟水退再行覆勘此四月十八日之奏也閏六月間先公緣事罷斥未及覆奏

嘉慶二十一年六月十八日

奏爲派員勸濬西淀下游之大港河一道工程報竣驗
收恭摺奏

聞事竊查直隸河渠沾淀淤塞甚多嘉慶十九年春間曾
奉

諭旨興修水利原係有益民生之事但闔省河道溝渠官
爲經理帑項萬不能給欽此嗣經臣派員在趙北口十

二連橋一帶勸諭居民就近開濬夏秋以後溢河
下游遂未泛溢臣因直省水利一時驟難全修屢

經諮訪講求擬將各河道勘明均先於下游着手

辦一節卽受一節之益諄飭沿河各州縣隨時隨處勸諭居民各先就近疏濬民力不敷再由臣覈明酌款給用以資補救曾經具

奏在案隨查得雄縣任邱交界有大港河一道爲西淀全局最關緊要之一河緣西淀十二川之水畢注於趙北口十二連橋以東向賴黑洋南營大港三淀以爲儲蓄馬道正支二河以爲傳送因二河河身灣曲易淤在北之清河門又有白溝河挾沙直射橫截上游淀水出路一經盛漲左右毗連之十二州縣民田廬舍在在成災是以乾隆十年在於

南首接大港淀另闢大港河一道與白溝南北殊途不爭軌轍三股分注得可暢消自有此河以後數十年不報水災至乾隆五十年以後逐漸淤塞近年上下二十餘里盡爲平地嘉慶十三十六等年節次委員勘估未卽興辦臣於本年春間派委河間府同知王履泰前往查勘照原河面底寬深丈尺濬便復舊約計水旱泥湍蘆葦根土十萬餘方旋飭該員會同雄縣知縣何維綺任邱縣知縣李壽春親赴該處與兩縣沿河七十四村居民詳細勸導該居民等均各欣然樂從遂於四月初旬

先後開工該同知王履泰親駐河干督率指畫該縣何維綺李壽春捐資輪賞衆夫每段卽於民夫之中選能事之人自爲統約不使胥役一人滋擾該民夫等咸知工係自衛俱各踴躍趨赴日以千計至五月中旬招徠愈衆該員等會稟工程辦有七八分正苦水葦土方挖掘倍爲費力適有新安縣知縣李重發親身帶領民夫千名來工助挖附近之四十七村各居民益各加倍奮勉臣恐該縣捐賞不敷當復檄飭藩司在於水利生息款項下撥銀五百兩發交該同知王履泰酌加賞勸並飭

趕緊濬辦茲據稟報已於六月初三日完工計開
大港河道工長二十里零九十丈河面寬均六丈
底二丈又抽子溝一丈深均七尺頭段留河門一
道於五月二十八日開河放水極爲通暢共計所
出旱土一萬餘方泥濘土一萬六千餘方水方四
萬六千五百餘方蘆葦根土三萬二千五百餘方
其所出廢土卽在該河迤東南首築堤一道長二
千六百丈有零攔護附近民田五千餘頃繪具圖
說稟報前來臣復檄派宣化府同知馮桂棻前赴
該處查照所稟濬築各工逐一驗收均與稟報相

符臣查東西兩淀淤阻情形東淀較通而西淀全塞比較地勢亦東淀較寬而西淀較隘是以西淀附近十二州縣不須盛漲卽瀝水所聚均能爲患因無去路每年趙北口

行宮以外平地皆水糧鹽貨艘一入西淀往往屈曲起剥倍形艱苦茲將廢河三股疏濬一股俾有一綫可通之路於兩淀水勢適得其平從此上村一帶積年水占之地皆可涸出耕種糧鹽運道亦不須由民膝溝洫轉運起剥實屬大有裨益該同知王履泰勘畫董勸一手經理雄縣知縣何維綺任邛

縣知縣李壽春捐資助備民食不辭勞瘁新安縣
知縣李重發勸衆助夫捐糧協濟均尚屬認真雖
俱係地方各官分內應辦之事惟直省水利實爲
民生至計必須乘時修濬此後應修之工尚多地
方官果能不辭勞瘁認真勸修則爲日起有功
爲鼓勵首事起見請

旨將該同知王履泰知縣何維綺李壽春李重發均交部
議敘以爲首事之勸則各屬觀感興起於民事實
有裨益可否之處出自

聖主天恩謹

奏

嘉慶二十一年六月二十日奉

上諭那彥成奏勸濬大港河工程出力各員請旨鼓勵一摺直隸西淀下游大港河道日久淤塞經該委員等勘畫倡捐董勸疏濬辦有成效同知王履泰知縣何維綺李壽春李重發均著加恩交部議敘

嘉慶十九年閏二月十四日

奏爲欽奉

上諭恭摺覆奏事竊臣承准軍機大臣字寄欽奉

上諭御史陳鍾麟奏請興直隸農田水利一摺興修水利

廣開稻田如堤防足以備旱澇原係有益民生之事但
闔省河道溝渠官爲經理帑項萬不能給若如該御史
所奏慎選良吏鼓舞民情導以種植之法試墾一二處
事或可行著將陳鍾麟原摺發交那彥成閱看直隸各
屬如下游沮洳之鄉能否試辦該督從容諮訪須通盤
籌畫方可定議茲事體大物博非能責之旦夕者也欽
此仰見

皇上詳察情形期收實效之至意臣實深欽佩伏思養民
之道足食爲先而足食之方重農爲亟必須興利
防患水旱無虞方能使儲蓄充盈緩急有備直隸

水利久未興修河道大率淤高堤埝類多殘缺一遇天時亢旱既無灌溉可資若雨水稍多又無疏消之路是以偏災屢見戶鮮蓋藏若將水利先事興修誠於閭閻有益但疏濬堤防需費甚鉅既非借用民力所能集事若官爲經理則

國家經費有常非一時所敢率行籌議至直隸地方形勢東南一帶窪下居多開墾稻田果能藉有成效原可以收水利臣前此經過大名府屬之開州東明長垣及遵化州屬之玉田豐潤永平府屬之灤州各境內均有河道曾諄屬該州縣等勸民改種

水田惟南北氣候不同種植之法亦異必得地方
牧令相度地勢徐徐勸導是否可以試辦既須察
地利之宜又須順民情之便此事言之甚易而行
之甚難誠如

聖諭非能責之旦夕

臣

惟有督率藩司選擇良吏飭令於

因公下鄉之時乘便察勘凡沮洳之區可以順勢
利導播種稻田者勸諭農民試墾一二果有成效
官再爲之經畫

臣

仰承

恩命畀任

畿封凡有利於

國計民生者自當實力講求悉心諮訪固不敢因循於
應辦之時亦不敢僥倖於難成之功總期計出萬
全法可久遠謹

奏奉

硃批經費充裕時再議

嘉慶二十年九月二十八日

奏爲遵

旨悉心籌度恭摺覆

奏事竊

臣

於九月二十四日承准軍機大臣字寄奉

上諭御史王嘉棟奏興修直隸水利一摺直屬河渠淤淀

淤塞日久若能修復舊規自於農田有益惟是地方廣
濶工費甚鉅難以興辦該御史請倣照營田之例於廢
員內許其捐資開濬以緩急分先後開竣一河再開一
河以十年爲期陸續辦理其言是否可行著交那彥成
悉心籌度妥議具奏該御史摺著發交閱看欽此

臣跪

讀之下仰見我

皇上軫恤民依勤求諮訪之至意伏查興修水利實爲直

隸第一要政

臣

渥荷

天恩畀以

畿輔重任無日不以疏濬宣洩爲念本年春間

臣派員

勘查滏河下游並飭在趙北口十二連橋一帶勸諭居民就近開濬夏秋以後水勢漸平而淤墊稍加疏導河水遂未泛溢是疏一河之淤卽以興一河之利其效本可立致惟是幅員遼濶支幹紛歧溯自雍正年間及乾隆初年興修以來已閱六七十年淤墊既久修復非易誠如

聖諭地方廣濶工費甚鉅難以興辦今該御史請倣照營田之例令廳員捐資開竣一河再開一河分先後緩急次第辦理等語固係爲設法修復水利起見第查營田祇在一隅河渠沾淀大者界連數州縣

小亦綿延百餘里支分派別其難易廣狹情形隨時變遷與營田迥不相侔營田祇需官爲經理至欲興修全省水利有利於此卽有妨於彼此河未修卽彼河亦難就緒專藉民修不能不恃官法之彈壓專派官辦不能不資輿情之趨附又必通盤籌畫勘明全省之水勢預籌數百萬之經費由源達委縷晰條分方期辦理充裕可收水利之全效若僅責令廢員捐資承辦不惟此界斷枝枝節節所能爲且廢員之資并有阻河淀之綿亘無涯轉恐有名無實徒啟奔競之風於農田未能

實有裨益臣於立秋以來時常請求諮訪擬將各河道勘明將先於下游着手已臣飭沿河各州縣官隨時隨處勸諭居民各先就近湔浚民力不敷再由臣核明酌款給用以資補救之計總須自下而上辦一節卽受一節之益如有需動支錢糧之處陸續給發辦理既歸覈實出入亦易稽查持此恒心十年自當辦有成效該御史請修水利實爲地方要政至請照營田辦理之處應毋庸議臣謹將前後籌酌緣由恭摺覆奏謹

奏奉

硃批此事頗難從緩辦理只好隨時補救耳

那文毅公初任直隸總督奏議卷四十七